

## **Pled d'avertura da la sessiun d'avust 2023** **President dal Cussegl grond Tarzisius Caviezel**

---

*(Valair vala il pled discurre)*

Stimadas deputadas e stimads deputads

Stimadas collegas e stimads collegas

Stimada commembra e stimads commembers da la Regenza

Preziads giasts sco er collavuraturas e collavuratur da las medias

Nus vivain en in temp captivant. Nus vivain en in'epoca dinamica, nua che nus vesain e sentin mintga di, co ch'il mund sa mida. Mintga di udin nus novitads da gronda impurtanza che ston vegnir validadas, che vegnan integradas en l'agen maletg dal mund u che adattan schizunt quest maletg.

In pol calm, ina constanta en quest temp hectic dals ultims 12 mais, è stà il Cussegl grond. Jau speresch, che er Vus sajas stadas cuntentas e cuntents cun mia lavur, che las sesidas sajan stadas caracterisadas da cuntinuitad empè da hectica e che jau haja – er ord Vossa vista – manà las activitads dal Cussegl grond dal chantun Grischun conform a las pretensiuns. Jau ma sun sinceramain engaschè per quest intent.

Per mai èsi stà impurtant, da far endament al Cussegl grond l'integraziun da sia lavur en ils svilups globals, en las crisas actualas e da preschentar l'impurtanza dal Cussegl grond per il mantegniment da noss stadi democratic. Las commembras ed ils commembers dal Cussegl grond pon s'engaschar dapertut en questas dumondas, gea ellas ed els ston s'engaschar, per gidar il «Grischun» sco cuminanza da lavur e da vita a dumagnar sias sfidas. Las deputadas ed ils deputads ston esser in exempel per nossa populaziun.

Quai tut na tuna betg fitg interessant, betg electrissant. Tuna quai forsa per Vus sco lavur da mintgadi stentusa? Natiralmain che las crisas ch'èn cumparidas l'ultim temp n'èn betg svanidas. Ins na las po betg simplamain cliccar davent u dumandar spontanamain ina resposta da l'intelligenza artificziala ed alura surdar la resposta correspundenta ad insatgi per la liquidar. Soluziuns per las grondas dumondas, che er il Grischun sto chattar per sai, – la vieuta energetica, la problematica da guerras e da fugitivs, la midada dal clima e la protecciun da l'ambient, augments da tschains e la crisa finanziaria, las relaziuns da stgarsezza en connex cun victualias, medicaments, cumponentas da computer e metals, la mancanza da persunas spezialisadas, cyberattatgas, de-risking (furmar intenziunadamain blocs politics-economics) – soluziuns per questas grondas dumondas dovran bler temp e blera perseveranza e ston vegnir divididas en plirs pitschens pass d'acziun.

Per che nus tegnian la dira per chattar soluziuns e per che nus restian motivadas e motivads, stuain nus avair in'atgna motivaziun da dadens anora – vul dir ina motivaziun «intrinseca», sco che la psicologia la numna. Jau pens che Vus hajas questa motivaziun, uschiglio na sesessas Vus betg qua en questa sala. Quai èn nossas valurs, che n'èn betg mo la norma per

noss agir, mabain che ans motiveschan er d'ans engaschar per ina chaussa surordinada, d'ans unir e da metter ils interess da la cuminanza sur l'interess persunal.

Nossas valurs – jau na vulesch offender nagin, ma formulesch ina giada per nus tuttas e tuts – nossas valurs èn:

- il senn da responsabladad per in svilup futur segirà da noss chantun e da nossa societad;
- l'orientaziun a la realisaziun, pia betg mo «baterlar», mabain er «furnir»;
- ponderaziuns da qualidad e da persistenza;
- avoir quità da nossa democrazia.

Per mai – sco Voss president – èsi adina stà impurtant, da metter en il center questa voluntad e questa forza da collavurar – la voluntad e la forza, che nossas generaziuns precedentas che han costruì quest chantun, han exprimì e quest potenzial che er nus possedain.

Nus avain schizunt anc dapli pussaivladads che nossas generaziuns precedentas, perquai che nus ans chapin anc meglier grazia a la nova translaziun simultana. Tenor mes giudicament stuessan las reflexiuns che vegnan exprimidas en questa sala sur l'indiriz respectiv, cuntanscher per 100 pertschient ils chaus da tut las personas preschentas.

Nus avain collià aspectativas cun questa translaziun simultana. Ussa avain nus l'incumbensa da realisar er sezzas e sezs questas visiuns respectivamain profezas positivas. Sch'igl è pussaivel cun questas translaziuns, da chattar anc megliers resultats da lavur, cumpromiss e soluziuns da proceder, per che uschè bleras e blers da nus sco pussaivel possian esser uschè cuntentas e cuntents sco pussaivel, lura è l'investiziun sa pajada e nus pudain far nossa lavur en moda optimala en l'interess da tut las burgaisas e da tut ils burgais dal Grischun, e quai en il senn d'ina lutga democratica per soluziuns optimalas.

Per finir mes patratgs introductivs per questa sessiun vulesch jau engraziar a Vos persunalmain. Per Voss sustegn constructiv a favur da la lavur dal presidi dal Cussegl grond, en spezial per manar las sessiuns. Propostas davart il proceder per curreger il president dal Cussegl grond n'èn vegnidas fatgas naginas.

Na, seriusamain: jau hai sentì il sustegn da l'entir cussegl sco er Vossa confidenza ed hai stimà fitg ils inscunters persunals cun Vos. Jau hai exequì gugent las obligaziuns dal president dal Cussegl grond ed hai er survegnì correspudentamain ils plaschairs immanents da l'uffizi. Engraziar vulesch jau er al Secretariat dal Cussegl grond per la buna preparaziun ed il sustegn per manar las sesidas.

Stimadas dunnas e stimads signurs, in giavisch hai jau anc: Dai er a mia successura u a mes successur en il presidi dal Cussegl grond vinavant quest sustegn impurtant.

Jau declar la sessiun d'avust 2023 per averta.